

## 開放文學 – 神鬼仙俠 – 東遊記 四四 湘子設筵和好

卻說鐵拐諸仙，專候鐘離消息，忽仙姑至。鐵拐問曰：“汝探鐘離、洞賓之事如何？”仙姑曰：“鐘離已自收伏洞賓，今皆回矣。”鐵拐曰：“洞賓雖歸，理不可縱，必須面責其非，今自謝罪，庶幾長幼之分不紊，仙家之禮不亂。不然，彼將以天下事，皆可玩弄矣。”果老曰：“老仙之言，正合吾意。”言猶未了，鐘、呂皆到。鐵拐正色謂洞賓曰：“嗜酒貪花，皆汝事實。鐘離言及於此，於汝何傷？汝乃逞能挾仇，播弄大禍，以今觀之，果能逆氣數以逞才能乎。無知小子，犯分欺天，若非眾友解勸，奏汝天庭，永墜塵凡，不得超生矣！”洞賓曰：“非是我抗師父之言，但因椿精凡同作孽，欲往收之。及至今見此陣紛紜，一時技癢，聊試陣法於軍中，不意利害至此！”鐵拐大怒曰：“椿精本汝所使，欲逆氣數，是汝本心。今乃借此為言，迷眾耳目，利口奸心，全不可與入道矣。此匹夫，留此必為雲為雨。”乃拂袖而起。眾皆向前勸住。鐵拐大罵不休。果老謂洞賓曰：“汝既作事輕狂，便當小心領罪，乃飾辭掩護，安得老仙不怒？可聽吾言，向前謝罪。”果老乃引洞賓於鐵拐、鐘離之前，下拜請罪。眾復為之告免。湘子乃為開筵把盞，鐵拐怒氣乃息，然後和好如初。於是開懷暢飲，酒至半酣，鐵拐曰：“上界八洞諸仙，而今七人於此。但再得一人，可配足矣！諸友何不推舉一人，以足其數。”眾言見曹後有弟一人，真是仙骨，異日當成正果，可引入班。鐘離曰：“另日待我親往試之，如有道行，引之不難。”眾皆曰：“可。”至是鐵拐離席，勸勉洞賓數杯，眾仙各相酬飲，大醉而罷。